

Atuagaq nutaaq

Ullumimit isigalugit


Hal: Nunatta inui tamaasa naatsorsuutigigaanni ilimagisarpara inuppassuit taalliorniarnermik soqutigisaqartut. Amerlasuut nalliuttorsiornermut imaluunniit akunnaatsuliinernut assigiingitsunut atatillugu aliikkusersuutissamik taalliorparput, taamalu iliortut erinamik pioreersumik ilisseruteqarajupput. Allat pinngortitamit sunnigaallutik misigisartik nalunaartarpaat, sulilu inuit ilaat asanninnermik tunngavilimmik erinalersuutilioraat. Taakkunannga ikinnerupput eqqarsaatersuutininik itisuunik inuup inuunerani paasisanik tannilluunniit aalariaataanik pigisaqarlutik isummaminnik nalunaarsuisut.

Taasannut kingullernut ilaavoq maanna taalliorput ilisimallualigarput Frederik Kristensen, kunngi. Inuit ukiut 1940-p missaanit 1960 nallerlugu inunngorfillit, utoqqaatigiit nunatinni ineriartornermik aalajangersimasumik atuisut, taamalu assigiikannersuunik aqqusaagaqartut akornanni eqqumiitsuliornikkut nuimasortaannut ilaavoq Frederik Kristensen, kunngi. Qalipaalluni assilialiorput ilisimaleqqaarparput, kingornali pisinnaasani allat atulerpai, soorlu nipilersornerup taalliornerullu iluani.

Taalliorput kingusikkaluamik saqqummersut inuusunerminnili tamatuminnga ingerlassaqareersartut ilimanarpoq, inuusuttuaraanermi misileraanerit qaangiukkaangata ilungersuussineq tulliuttaraaq soqutiginnittut akornanni.

Kunngip taallat allattarsimasani saqqummersinnerli ajukkani katersoriarlugit atuaganngorterusulersimavai, pisoqaanerpaat 1978-imik ukiuligaapput nutaanerillu 2004-mi, immaqali suli nutaanekaraluarthoq ukiup taassuma kingorna qanga allagaanerinik nalunaagaanngitsunik ilanngussaqaarsimavoq. Taamaalilluni taallat 71-t ataatsimut taasani "Ippassaq Ullumeqarani Aqagu" saqqummersipai atuakkami immikkoortunut tallimanut iliorarlugit.

Immikkoortiterneri siullesq 16-inik taallartaqartillugu tullesq 15-inik, pingajuat 20-nik, sisamaat 19-inik taallimaallu ataatsimik taallartaqarput. Immikkoortut immikkut qulequtaqanngimata suna pillugu taama iliugaanerat ersernerlukujuppoq. Taallalli atuaqattarlugit siunnerfi misissorakkit isumai tunuliaqutaasut paasisoraakka. Taalliorput inissiffik qitiliukkaanni immikkoortuni siullerni "ippassaq" pisimasut akuullattaarput, soorlu meeraanermi inuusuttunngornermilu nalaatat assigiinngitsut inuiaqatigiit ineriartortitaanerannut tunngassutillit. Immikkoortunut tamanut ilaajuannartutut paasisoraakka taalliat oqaatigisaat qanga pisi- manerinik nalunaagaanatik ukiuni sunilluunniit pisinnaasutut naatsorsuutigineqarsinnaasut, soorlu pinngortitamit pisaartut assigiinngitsut, tassa "ullumeqanngitsut"; kiisalu taallat "aqagu" pisin-



naasutut naatsorsuussatut paasisorisakka amerlanatik ilaapput.

Taama iliornikkut taalliorput atuaganngortitsinermi siunertaa erseqqisineruvoq. Immikkoortuni tamani inuttut ataatsitut misiginerit uparuartarialittullu isigisani ineqartippai. Meeraanermi misigisat inuusuttunngoriartornermi aqqusaakkat inersimasutullu oqaatigerusutanik anitsinerit tamarmik siumugassaapput. Immikkoortut pingajuanni immikkut malugaara inuiaqatigiinni ajornartorsiutit ilaannut uparuartuineera, imigassamik atuneq iluanngitsoq piinnarnagu aammali inuusutissarsiornermi tunngaviup pinngortitamik illersuiniaqatigiinnit mingutsitsisunillu pineqarnera taakkartorlugu. Immikkoortulli sisamaanni nipit sallaannerulerput tarnikkut aalaterneqaatit ilaalmata.

Misigineqarsinnaasut kunngip taalliamini sammisai assigiinngingaatsiarput. Misigissutsinit sallaannerpaanit

oqaatiginiakkanut sakkortusinnaasunut. Ilaatigut oqaasertalertarpai pissutsit imminni nalunangitsut, soorlu: "Taseraq / ikani aqqutinniittoq / kussiorneqarsimagami / imaalerpoq". Allanili imaaliallaannaq paasiuminaatsut oqaatigisairai, soorlu: "silarsuup tarniga / najuus-sorpaa ./ soorlu uummatima / tillerenera nikingasoq / tarnima piunasaanit. / Ila aqunneqarpunga / imminik uanga qitinnik / nikingavunga. / Avannga samanga / oqimaalutarneqarpoq inuunera". Inuunerup ingerlanera angajoqqaat perorsaanerminni tunniussaat, namminerlu kinguaanut ingerlateqqissallugu pingaartitaq taallatut oqaatigisaanut ilaa-

voq, soorlu: "Meerannguullungali / paasineq sapigara / ajunnginnersuat angajoqqaannguama..", namminerli angajoqqaanngorneq pisussaaffimmik ima-qarpoq taallami allami taasaanik: "Ajunngitsumik ajoqersuuppatsigit naalallutit inuugavit. / Naalakkavit / inersimasugut oqaatsivut / paasillugit / toqqissillutit malippatit"../.

Taallat ataatsimut isigalugit inuup eqqarsarnermini inerinernerik pigisallip piliarai. Eqqarsaatit itisuut pissutsinillu isiginninneq oqaatiginiakkanut sassalutik inissisimapput. Tikeq qullagaq ersingajattaraluarpoq, nuisinnaguli erseqqissumik isummiutit taartaasarput.

Kunngi oqaatsinik atullaqqissuuvoq, taallanngortitsinerminilu periaaseq erinaqanngitsuliormermik taaneqarsinnaasoq atortarlugu, taamaattorli ilimagineqarsinnaasoq tassaavoq taallat arlallit erinaqarnissaat.

**Frederik Kristensen, kunngi:
Ippassaq Ullumeqarani Aqagu
Taallat
Qupp. 135, akia kr. 198,00
Forlaget Atuagkat**